

# 推背圖




## 金圣叹序

谓数可知乎？可知而不可知也。谓数不可知乎？不可知而可知也。可知者数，不可知者亦数也。可知其所不可知者数，不可知其所可知者亦数也。吾尝仰观于天，日月星辰犹是也；俯察于地，山川草木犹是也。我所亲见之天地，非犹我所未亲见之天地耶。然不得谓我所未亲见之天地，即为我所亲见之天地。天地自天地，而我异矣。我自我，两天地异矣。我生以前之天地可知也，可知者数也。我生以后之天地不可知也，不可知者亦数也。有生我以前之天地，然后有我生以后之天地，此可知其所不可知者数也。我生以后之天地，岂不同于我生以前之天地，此不可知其所可知者亦数也。数之时义大矣哉。

唐臣袁天罡、李淳风著有“推背图”，父老相传，迄未寓目。壬戌之夏，得一抄本，展而读之，其经过之事若合符节，其数耶，其数之可知者耶，其数之可知而不可知而可知者耶。

玩其词，参其意，胡运不长，可立而待，毋以天之骄子自处也。

癸亥人日 金喟识



第一象 甲子 乾下乾上 乾

讖曰：

茫茫天地 不知所止


日月循环 周而复始

颂曰：

自从盘古迄希夷 虎斗龙争事正奇

悟得循环真谛在 试于唐后论元机

金圣叹：“此象古今治乱相因，如日月往来，阴阳递嬗，即孔子百世可知之意，红者为日，白者为月，有日月而后昼夜成，有昼夜而后寒暑判，有寒暑而后历数定，有历数而后系统分，有系统而后兴亡见。”



第二象 乙丑 巽下乾上 姤

讖曰：

累累硕果 莫明其数  
一果一仁 即新即故

颂曰：

万物土中生 二九先成实  
一统定中原 阴盛阳先竭

金圣叹：“一盘果子即李实也，其数二十一，自唐高祖至昭宣凡二十一主。二九者指唐祚二百八十九年。阴盛者指武曌当国，淫昏乱政，几危唐代。厥后开元之治，虽是媲美贞观，而贵妃召祸，乘舆播迁，女宠代兴，夏娣继之，亦未始非阴盛之象。”



第三象 丙寅 艮下乾上 遁  
讖曰：

日月当空 照临下土  
扑朔迷离 不文亦武

颂曰：

参遍空王色相空 一朝重入帝王宫  
遗枝拨尽根犹在 喔喔晨鸡孰是雄

金圣叹：“此象主武曌当国，废中宗于房州，杀唐宗室殆尽。先武氏削发为尼，故有参遍空王之句。高宗废后王氏而立之，故有喔喔晨鸡孰是雄之兆。”



第四象 丁卯 坤下乾上 否  
讖曰：

飞者不飞 走者不走  
振羽高冈 乃克有后

颂曰：

威行青女实权奇 极目萧条十八枝  
赖有猴儿齐着力 已倾大树仗扶持

金圣叹：“此象主狄仁杰荐张柬之等五人反周为唐。武后尝梦鸚鵡两翼俱折，狄仁杰曰：武者陛下之姓也，起二子则两翼折矣。五猴指张柬之等五人。”



第五象 戊辰 坤下巽上 观  
讖曰：

杨花飞 蜀道难  
截断竹箫方见日 更无一史乃平安

颂曰：

渔阳鼙鼓过潼关 此日君王幸剑山  
木易若逢山下鬼 定于此处葬金环

金圣叹：“一马鞍指安禄山，一史书指史思明。一妇人死卧地上，乃贵妃死于马嵬坡。截断竹箫者肃宗即位，而安史之乱平。”





第六象 己巳 坤下艮上 剥  
讖曰：

非都是都 非皇是皇  
陰霾既去 日月復光

頌曰：

大帟巍巍樹兩京 輦輿今日又東行  
乾坤再造人民樂 一二年來見太平

金聖嘆：“此象主明皇還西京，至德二載九月，廣平王叔俶郭子儀收復西京，十月收復東京，安史之亂盡弭，十二月迎上皇還西京，故云再造。”



第七象 庚午 震下乾上 无妄

讖曰：

旌节满我目 山川蹋我足  
破关客乍来 陡令中原哭

颂曰：

蝼蚁从来足溃堤 六宫深锁梦全非  
重门金鼓含兵气 小草滋生土口啼

金圣叹：“此象主藩镇跋扈及吐蕃入寇中原。”



第八象 辛未 坤下离上 晋

讖曰：

撓枪血中土 破贼还为贼  
朵朵李花飞 帝曰迁大吉

颂曰：

天子蒙尘马首东 居然三杰踞关中  
孤军一驻安社稷 内外能收手臂功

金圣叹：“此象主建中之乱，三人者李希烈、朱泚、李怀光也。李怀光以破朱泚功，为卢杞所忌，遂反，故曰破贼还为贼。三人先后犯阙，德宗乘舆播迁，赖李晟以孤军收复京城，而社稷重安矣。”



第九象 壬申 乾下离上 大有  
讖曰：

非白非黑 草头人出  
借得一枝 满天飞血

颂曰：

万人头上起英雄 血染河山日色红  
一树李花都惨淡 可怜巢覆亦成空

金圣叹：“此象主黄巢作乱，唐祚至昭宗。朱温弑之以自立，改国号梁温，为黄巢旧党，故曰覆巢亦成空。”



第十象 癸酉 坎下坎上 坎  
讖曰：

荡荡中原 莫御八牛  
汭水不滌 有血无头

颂曰：

一后二主尽升遐 四海茫茫总一家  
不但我生还杀我 回头还有李儿花

金圣叹：“此象主朱温弑何皇后、昭宣、昭宗而自立，所谓一后二主也。未几为次子友圭所弑，是颂中第三句意。李克用之子存勖代父复仇，百战灭梁，改称后唐，是颂中第四句意。”



第十一象 甲戌 兑下坎上 节

讖曰：

五人同卜 非禄非福  
兼而言之 喜怒哀乐

颂曰：

龙蛇相斗三十年 一日同光直上天  
上得天堂好游戏 东兵百万入秦川

金圣叹：“此象主伶人郭从谦作乱，唐主为流矢所中。”



第十二象 乙亥 震下坎上 屯  
讖曰：

块然一石 谓他人父  
统二八州 已非唐土

颂曰：

反兆先多口 出入皆无主  
系铃自解铃 父亡子亦死

金圣叹：“此象主石敬瑭求救于契丹。唐主遣张敬达讨石敬瑭，敬瑭不得已，求救于契丹，事之以父礼，贿以幽蓟十六州。晋帝之立国契丹功也，然卒以契丹亡，故有系铃解铃之兆。”



第十三象 丙子 离下坎上 既济

讖曰：

汉水竭 雀高飞

飞来飞去何所止 高山不及城郭低

颂曰：

百个雀儿水上飞 九十九个过山西

惟有一个踏破足 高栖独自理毛衣

金圣叹：“此象主周主郭威夺汉自立。郭威少贱，世称之曰郭雀儿。”





第十四象 丁丑 离下兑上 革

讖曰：

李树得根芽 石榴漫放花

枯木逢春只一瞬 让他天下竞荣华

颂曰：

金木水火土已终 十三童子五王公

英明重见太平日 五十三参运不通

金圣叹：“此象主周世宗承郭威受命为五代之终，世宗姓柴名荣，英明武断，勤于为治，惜功业未竟而殁。五代共五十三年，凡八姓十三主，颂意显然。”



第十五象 戊寅 离下震上 丰

讖曰：

天有日月 地有山川  
海内纷纷 父后子前

颂曰：

战事中原迄未休 几人高枕卧金戈  
寰中自有真天子 扫尽群妖见日头

金圣叹：“此象主五代末造，割据者星罗棋布，惟吴越钱氏〈钱镠四世〉稍图治安，南唐李氏〈李升三世〉略知文物，余悉淫乱昏虐。太祖崛起，拯民水火。太祖小名香孩儿，手执帚著，扫除群雄也。”



第十六象 己卯 离下坤上 明夷  
彖曰：

天一生水 姿稟圣武  
顺天应人 无今无古

颂曰：

纳土姓钱并姓李 其余相次朝天子  
天将一统付真人 不杀人民更全嗣

金圣叹：“此象主宋太祖受禅汴都，天下大定，钱李二氏相率归化，此一治也。”



第十七象 庚辰 坎下坤上 师

讖曰：

声赫赫 干戈息  
扫边氛 奠邦邑

颂曰：

天子亲征乍渡河 欢声百里起讴歌  
运筹幸有完全女 奏得奇功在议和

金圣叹：“此象主宋真宗澶渊之役。景德元年，契丹大举入寇，寇准劝帝亲征，乃幸澶渊。既渡河，远近望见卸盖皆踊跃呼万岁，声闻数十里，契丹夺气，遂议和。”



第十八象 辛巳 艮下艮上 艮  
讖曰：

天下之母 金刀伏兔  
三八之年 治安巩固

颂曰：

水旱频仍不是灾 力扶幼主坐灵台  
朝中又见钗光照 宇内承平气象开

金圣叹：“此象主仁宗嗣立，刘太后垂帘听政。旁有一犬，其惟狄青乎。”



第十九象 壬午 离下艮上 贲

讖曰：

众人囂囂 尽入其室  
百万雄狮 头上一石

颂曰：

朝用奇谋夕丧师 人民西北尽流离  
韶华虽好春光老 悔不深居坐殿墀

金圣叹：“此象主神宗误用安石，引用群邪，致启边衅，用兵西北，丧帅百万。熙宁初，王韵上平戎叁策，安石惊为奇谋，力荐于神宗，致肇此祸。”



第二十象 癸未 离下乾上 同人  
讖曰：

朝无光 日月盲  
莫与京 终旁皇

颂曰：

父子同心并同道 中天日月手中物  
奇云翻过北海头 凤阙龙廷生怛惻

金圣叹：“此象主司马光卒，蔡京父子弄权，群小朋兴，贤良受锢，有日月晦盲之象。”



第二一象 甲申 兑下艮上 损

讖曰：

空厥宫中 雪深三尺

吁嗟元'首首' 南辕北辙

颂曰：

妖氛未靖不康宁 北扫烽烟望帝京

异姓立朝终国位 卜世三六又南行

金圣叹：“此象主金兵南下，徽宗禅位。靖康元年十一月，京师陷，明年四月，金以二帝及宗室妃嫔北去，立张邦昌为帝。卜世三六者，宋自太祖至徽钦，凡九世，然则南渡以后又一世矣。”





第二二象 乙酉 兑下离上 睽

讖曰：

天马当空 否极见泰  
凤凤森森 木葍大赖

颂曰：

神京王气满东南 祸水汪洋把策干  
一木会支二八月 临行马色半平安

金圣叹：“此象乃康王南渡。建都临安，秦桧专权，遂成偏安之局。当时之史实鉴之。木葍，康王名构。一木会支二八月者汉奸也，木会即合为桧，春之一半，秋之一半，可合成秦字，妙之王也。



第二三象 丙戌 兑下乾上 履


讖曰：

似道非道 乾沈坤黯  
祥光字内 一江断楫

颂曰：

胡儿大张挾伐威 两柱擎天力不支  
如何兵火连天夜 犹自张灯作水嬉

金圣叹：“此象主贾似道当权，汪立信文天祥辈不能以独力支持宋室。襄樊围急，西子湖边似道犹张灯夜宴，宋室之亡其宜也。”



第二四象 丁亥 兑下巽上 中孚  
讖曰：

山崖海边 不帝亦仙  
二九四八 于万斯年

颂曰：

十一卜人小月终 回天无力道俱穷  
干戈四起疑无路 指点洪涛巨浪中

金圣叹：“此象主帝昺迁山，元令张弘范来攻，宋将张世杰兵溃，陆秀夫负帝赴海：宋室以亡。”



第二五象 戊子 艮下巽上 渐

讖曰：

北帝南臣 一兀自立  
斡离河水 燕巢捕“麦戈”

颂曰：

鼎足争雄事本奇 一狼二鼠判须臾  
北关锁钥虽牢固 子子孙孙五五宜

金圣叹：“此象主元太祖称帝斡难河，太祖名铁木真，元代凡十主。斧铁也，柄木也，斧柄 十段即隐十主之意。”



第二六象 己丑 震下震上 震  
讖曰：

时无夜 年无米  
花不花 贼四起

颂曰：

鼎沸中原木木来 四方警报起边垓  
房中自有长生术 莫怪都城澈夜开

金圣叹：“此象主顺帝惑西僧房中运气之术，溺于娱乐，以致刘福通、徐寿辉、方国珍、明玉珍、张士诚，陈友谅等狼顾鸱张，乘机而起。宦官朴不花壅不上闻，至徐达，常遇春直入京师，都城夜开，毫无警备。有元一代竟丧于淫僧之手，不亦哀哉。刘福通立韩林儿 为帝，故曰木木来。”



第二七象 庚寅 乾下震上 豫

讖曰：

惟日与月 下民之极  
应运而兴 其色曰赤

颂曰：

枝枝叶叶现金光 晃晃朗朗照四方  
江东岸上光明起 谈空说偈有真王

金圣叹：“此象主明太祖登极。太祖曾为皇觉寺僧，洪武一代海内熙洽，治臻大平。”



第二八象 辛卯 坎下震上 解  
讖曰：

草头火脚 宫阙灰飞  
家中有鸟 郊外有尼

颂曰：

羽满高飞日 争妍有李花  
真龙游四海 方外是吾家

金圣叹：“此象主燕王起兵，李景隆迎燕兵入都，宫中大火，建文祝发出亡。”



第二九象 壬辰 巽下震上 恒

讖曰：

枝发厥荣 为国之栋  
皞皞熙熙 康乐利众

颂曰：

一枝向北一枝东 又有南枝种亦同  
宇内同歌贤母德 真有三代之遗风

金圣叹：“此象主宣宗时张太后用杨士奇、杨溥、杨荣三人，能使天下又安，希风三代，此一治也。时人稍士奇为西杨，溥为南杨，荣为东杨。”





第三十象 癸巳 巽下坤上 升

讖曰：

半圭半林 合则生变  
石亦有灵 生荣死贱

颂曰：

缺一不成也占先 六龙亲御到胡边  
天心复见人心顺 相克相生马不前

金圣叹：“此象主张太后崩权归王振，致有也先之患。其后上皇复辟，石亨自诩首功，率以恣横伏诛，此一乱也。”



第三一象 甲午 离下巽上 家人  
讖曰：

当涂遗孽 秽乱宫阙  
一男一女 断送人国

颂曰：

忠臣贤士尽沉沦 天启其衷乱更纷  
纵有胸怀能坦白 乾坤不属旧明君

金圣叹：“此象主天启七年间，妖气漫天，元气受伤。一男一女指魏阉与客氏而言。魏杀客氏，客氏熹宗乳母，称奉圣夫人。”



第三二象 乙未 巽下坎上 井  
讖曰：

马跳北阙 犬敖西方  
八九数尽 日月无光

颂曰：

杨花落尽李花残 五色旗分自北来  
太息金陵王气尽 一枝春色占长安

金圣叹：“此象主李闯、张献忠扰乱中原，崇祯投环煤山，福王偏安不久明祀遂亡。颂末句似指胡后，大有深意。”



第三三象 丙申 巽下兑上 大过  
讖曰：

黄河水清 气顺则治  
主客不分 地支无子

颂曰：

天长白瀑来 胡人气不衰  
藩篱多撤去 稚子半可哀

金圣叹：“此象乃满清入关之征。反客为主  
殆亦气数使然，非人力所能挽回欤。辽金而  
后胡人两主中原，璜璜汉族对之得毋有愧。”



第三四象 丁酉 巽下巽上 巽  
讖曰：

头有发 衣怕白  
太平时 王杀王

颂曰：

太平又见血花飞 五色章成里外衣  
洪水滔天苗不秀 中原曾见梦全非

金圣叹：“证已往之事易，推未来之事难，然既证已往，似不得不推及将来。吾但愿自此以后，吾所谓平治者皆幸而中，吾所谓不平治者幸而不中，而吾可告无罪矣。此象疑遭水灾或兵戎与天灾共见，此一乱也。”



第三五象 戊戌 震下兑上 随  
讖曰：

西方有人 足踏神京  
帝出不还 三台扶倾

颂曰：

黑云黯黯自西来 帝子临河筑金台  
南有兵戎北有火 中兴曾见有奇才

金圣叹：“此象疑有出狩事，亦乱兆也。”



第三六象 己亥 乾下巽上 小畜  
彖曰：

纤纤女子 赤手御敌  
不分祸福 灯光蔽日

颂曰：

双拳旋转乾坤 海内无端不靖  
母子不分先后 西望长安入颯

金圣叹：“此象疑一女子能定中原，建都长安。”



第三七象 庚子 震下巽上 益  
讖曰：

汉水茫茫 不统继统  
南北不分 和衷与共

颂曰：

水清终有竭 倒戈逢八月  
海内竟无王 半凶还半吉

金圣叹：“此象虽有元首出现，而一时未易平治，亦一乱也。”





第三八象 辛丑 震下离上 噬嗑  
讖曰：

门外一鹿 群雄争逐  
劫及鸢鱼 水深火热

颂曰：

火运开时祸蔓延 万人后死万人生  
海波能使江河浊 境外何殊在目前

金圣叹：“此象兵祸起于门外有延及门内之兆。”



第三九象 壬寅 震下艮上 颐  
讖曰：

鸟无足 山有月  
旭初升 人都哭

颂曰：

十二月中气不和 南山有雀北山罗  
一朝听得金鸡叫 大海沉沉日已过

金圣叹：“此象疑一外夷扰乱中原，必至酉年始得平也。”



第四十象 癸卯 巽下艮上 蛊

讖曰：

一二三四 无土有主  
小小天罡 垂拱而治

颂曰：

一口东来气太骄 脚下无履首无毛  
若逢木子冰霜涣 生我者猴死我雕

金圣叹：“此象有一李姓，能服东夷，而不能图长治久安之策，卒至旋治旋乱，有兽活禽死之意也。”



第四一象 甲辰 离下离上 离  
讖曰：

天地晦盲 草木繁殖  
阴阳反背 上土下日

颂曰：

帽儿须戴血无头 手弄乾坤何日休  
九十九年成大错 称王只合在秦州

金圣叹：“此象一武士握兵权，致肇地覆天翻之祸，或一百姓者平之。”



第四二象 乙巳 艮下离上 旅

讖曰：

美人自西来 朝中日渐安  
长弓在地 危而不危

颂曰：

西方女子琵琶仙 皎皎衣裳色更鲜  
此时浑迹匿朝市 闹乱君臣百万般

金圣叹：“此象疑一女子当国，服色尚白，大权独揽，几危社稷，发现或在卯年，此始乱之兆也。”



第四三象 丙午 巽下离上 鼎

讖曰：

君非君 臣非臣  
始艰危 终克定

颂曰：

黑兔走入青龙穴 欲尽不尽不可说  
唯有外边根树上 三十年中子孙结

金圣叹：“此象疑前象女子乱国未终，君臣出狩，有一杰出之人之为底定，然必在三十年后。”



第四四象 丁未 坎下离上 未济  
讖曰：

日月丽天 群阴慑服  
百灵来朝 双羽四足

颂曰：

而今中国有圣人 虽非豪杰也周成  
四夷重译称天子 否极泰来九国春  
金圣叹：“此象乃圣人复生，四夷来朝之兆，  
一大治也。”



第四五象 戊申 坎下艮上 蒙

讖曰：

有客西来 至东而止  
木火金水 洗此大耻

颂曰：

炎运宏开世界同 金乌隐匿白洋中  
从此不敢称雄长 兵气全消运已终

金圣叹：“此象于太平之世复见兵戎，当在海洋之上，自此之后，更臻盛世矣。”





第四六象 己酉 坎下巽上 涣  
讖曰：

黯黯阴霾 杀不用刀  
万人不死 一人难逃

颂曰：

有一军人身带弓 只言我是白头翁  
东边门里伏金剑 勇士后门入帝宫

金圣叹：“此象疑君王昏聩，一勇士仗义兴兵为民请命，故曰万人不死一人难逃。”



第四七象 庚戌 坎下乾上 讼  
讖曰：

偃武修文 紫薇星明  
匹夫有责 一言为君

颂曰：

无王无帝定乾坤 来自田间第一人  
好把旧书多读到 义言一出见英明

金圣叹：“此象有贤君下士，豪杰来归之兆，盖辅助得人，而帝不居德，王不居功，蒸蒸然有无为而治之盛。此一治也。”




第四八象 辛亥 离下乾上 同人  
讖曰：

卯午之间 厥象维离  
八牛牵动 雍雍熙熙

颂曰：

水火既济人民吉 手持金戈不杀贼  
五十年中一将臣 青青草自田间出

金圣叹：“此象疑一朱姓与一苗姓争朝纲，  
而朱姓有以德服人之化，龙蛇相斗，想在辰  
巳之年，其建都或在南方。”



第四九象 壬子 坤下坤上 坤  
讖曰：

山谷少人口 欲剿失其巢  
帝王称弟兄 纷纷是英豪

颂曰：

一个或人口内啼 分南分北分东西  
六爻占尽文明见 棋布星罗日月齐

金圣叹：“久分必合，久合必分，理数然也，然有文明之象，当不如割据者之纷扰也。”



第五十象 癸丑 震下坤上 复  
讖曰：

水火相战 时穷则变  
贞下起元 兽贵人贱

颂曰：

虎头人遇虎头年 白米盈仓不值钱  
豺狼结队街中走 拨尽风云始见天  
金圣叹：“此象遇寅年遭大乱，君昏臣暴，  
下民无生息之日，又一乱也。”



第五一象 甲寅 兑下坤上 临  
讖曰：

阴阳和 化以正  
坤顺而感 后见尧舜

颂曰：

谁云女子尚刚强 坤德居然感四方  
重见中天新气象 卜年一六寿而康

金圣叹：“此象乃明君得贤后之助，化行国内，重见升平，又一治也。卜年一六，或在位七十年。”



第五二象 乙卯 乾下坤上 泰

讖曰：

慧星乍见 不利东北  
踽踽何之 瞻彼乐国

颂曰：

櫓枪一点现东方 吴楚依然有帝王  
门外客来终不久 乾坤再造在角亢

金圣叹：“此象主东北被夷人所扰，有迁都南方之兆。角亢南极也。其后有明君出，驱逐外人，再度升平。”



第五三象 丙辰 乾下震上 大壮  
讖曰：

关中天子 礼贤下士  
顺天休命 半老有子

颂曰：

一个孝子自西来 手握乾纲天下安  
域中两见旌旗美 前人不及后人才

金圣叹：“此象有一秦姓名孝者，登极关中，控制南北，或以秦为国号，此一治也。”





第五四象 丁巳 乾下兑上 夬

讖曰：

磊磊落落 残棋一局

啄息苟安 虽笑亦哭

颂曰：

不分牛鼠与牛羊 去毛存鞮尚称强

囊中自有真龙出 九曲黄河水不黄

金圣叹：“此象有实去名存之兆，或为周末时，号令不行，尚颁止朔：亦久合必分之征也。”



第五五象 戊午 乾下坎上 需

讖曰：

惧则生戒 无远勿届  
水边有女 对日自拜

颂曰：

觊觎神器终无用 翼翼小心有臣众  
转危为安见节义 未必河山是我送

金圣叹：“此象有一石姓或刘姓一统中原，有一姓汝者谋篡夺之，幸有大臣尽忠王室，戒谨惕励，一切外侮不灭自灭，虽乱而亦治也。”



第五六象 己未 坤下坎上 比  
讖曰：

飞者非鸟 潜者非鱼  
战不在兵 造化游戏

颂曰：

海疆万里尽云烟 上迄云霄下及泉  
金母木公工幻弄 干戈未接祸连天

金圣叹：“此象军用火，即乱不在兵之意。  
颂云，海疆万里，则战争之烈，不仅在于中国也。”



第五七象 庚申 兑下兑上 兑  
讖曰：

物极必反 以毒制毒  
三尺童子 四夷謦服

颂曰：

坎离相克见天倪 天使斯人弭杀机  
不信奇才产吴越 重洋从此戢兵师

金圣叹：“此象言吴越之间有一童子，能出奇制胜，将燎原之火扑灭净尽，而厄运自此终矣，又一治也。”



第五八象 辛酉 坎下兑上 困

讖曰：

大乱平 四夷服  
称兄弟 六七国

颂曰：

烽烟净尽海无波 称王称帝又统和  
犹有煞星隐西北 未能遍唱太平歌

金圣叹：“此象有四夷来王，海不扬波之兆。惜乎西北一隅尚未平靖，犹有遗憾，又一治也。”



第五九象 壬戌 艮下兑上 咸

讖曰：

无城无府 无尔无我  
天下一家 治臻大化

颂曰：

一人为大世界福 手执筌筒拔去竹  
红黄黑白不分明 东南西北尽和睦

金圣叹：“此乃大同之象，人生其际，饮和食德，当不知若何也。惜乎其数已终，其或反本归原，还于混噩欤。”



第六十象 癸亥 坤下兑上 萃

讖曰：

一阴一阳 无始无终  
终者自终 始者自始

颂曰：

茫茫天数此中求 世道兴衰不自由  
万万千千说不尽 不如推背去归休

金圣叹：“一人在前，一人在后，有往无来，无独有偶，以此殿图，其寓意至深远焉。无象之象胜于有象。我以不解解之，著者有知当亦许可。”